

Powšitkowne WOZJEWJENJA

njedźelu, 18. nowembra 2018

1989! – A džensa?

Pozadki politiskeho přewróta lěta 1989 w NDR a zwiski k druhim europskim krajam předstaji něhdyši korespondent telewizijneho sćelaka ZDF Joachim Jauer pjatk, 23. nowembra, po wječornych kemšach w Ralbicach na „Radlubinje“, potajkim wot něhdže 19.45 hodž. Po přednošku je skladnosć, so z nim wo aktualnych prašenjach rozmołwjeć. Samsne zarjadowanje přewjedže so štwórtk, 22. nowembra, w 19.30 hodž. na žurli swjateje Hilžbjety w Kamjencu blisko katolskeje cyrkwy. Joachim Jauer budže swoje tři knihi „Urbi et Gorbi – Christen als Wegbereiter der Wende“ (2009), „Kennzeichen D. Friedliche Umwege zur deutschen Einheit.“ a „Der Sykophant – vom Ende einer Stasi-Karriere“ poskićeć a signować. Na wječoraj přeprošuje sekcija Wěda a skutk Towarstwa Cyrila a Metoda z.t.

Serbja a Awstralska

Maćična akademija přeprošuje na knižnu premjeru a přednošk k temje „Žiwnosćerjo ze Žarkow. Wuchaćec swójby w Awstralskej a w Němskej“. Zarjadowanje wotměje so štwórtk, 22. nowembra, w 19.30 hodž. w Budyskim hosćencu „Wjelbik“, Žitna 7. Robert Wuchatsch z Melbourne, kotrehož serbscy prjedownicy běchu w 19. lěstotku ze Žarkow do Awstralskeje wupućowali, předstaji swoju knihu wo stawiznach swojeje swójby. Nimo toho porěči Budyšan Tomas Dils wo wuwicu Wuchaćec swójby w Němskej. Zastup je darmotny.

Młodostni na Chrysta Krala do Chróścic

Nyšpor wosebje za wšitkich młodostnych budže na swjedženju Chrysta Krala, njedźelu, 25. nowembra, w 14.00 hodž., w Chróścanskej cyrkwi. Po nim su młodostni na faru k zhromadnej swačinje a na přednošk wo Awstralskej přeprošeni.

Zetkanje samostejacych w Smochćicach

Samostejacy ze serbskich wosadow su na swoje přichodne zetkanje srjedu, 12. decembra, w 14 hodž. do Domu biskopa Bena w Smochćicach přeprošeni. Zajimcy njech so prošu hač do srjedy, 5. decembra, w redakciji Katolskeho Posoła přizjewja, telefonowe čisło (0 35 91) 55 02 12. Štóž chce wotewzaty być, njech to prošu zdžěli. Wšitcy njech sej Wosadnik sobu přinjesu. Tež druzy su witani.

Paslenje adwentneje pychi

Dekanatne dušepastyrstwo džěci a młodžiny přeprošuje na paslenje adwentneje pychi do Don Boskoweho domu we Worklecach pjatk, 30. nowembra, wot 17 hač do 21 hodž. Witani su młodostni, maćerje a dalši zajimcy. Kóždy ma swój předžělany material zapłaćić.